

MERCVRIAL

FRANÇOIS,

Sur la responce de la  
Prosopopée touchant  
ce qui s'est passé à l'as-  
semblée de Loudun.



A PARIS.

Par PIERRE GAVTIER demeu-  
rant au mont S. Hilaire.

*Avec Permission.*



ITALY

Case


F

39

326

1620 mca

THE NEWBERRY  
LIBRARY



## MERCURIALE.



ESSIEURS,

Encores que la diuersité de la Religion soit comme vne paroy qui vous separe d'auec nous, & quoy que nous n'adorions pas tous sous la voute d'un mesme Temple, nous ne participions pas à un mesme calice, à mesmes Sacrements & ceremonies, comme faisoient nos Peres auec les nostres: Si est-ce que la charité Chrestienne & l'amour qu'on a naturellement enuers ses Compatriotes, faiçt que ie vous représenteray en peu de langage ce que le cours des affaires me faiçt apprehender pour vostre regard. Mais auant que de vous monstrier au doigt, comme le Ciel commence de se couurir, & comme il semble que vous soyiez menacez d'un mal auenir que vous vous susciterez de vous-mesmes, ie vous coniureray de mediter serieusement la douceur du repos & de la tranquillité dont vous iouïssiez maintenant sous le regne d'un Prince qui ne voulant ceder à nul de ses ayeuls,



4  
s'est acquis dès sa ieunesse le tiltre de I V S T E,  
& qui marchant sur les pas de cet Heros H E N -  
R Y L E G R A N D son Pere, vous protege,  
vous cherit, & n'apporte en la distribution  
des biens & des honneurs nulle autre diffe-  
rence entre ses subiects, que celle que leur  
donne le plus ou le moins de leur merite, ou  
de leur extraction; ainsi qu'un Alexandre ne  
discernoit les Grecs d'avec les Barbares, qu'à  
la seule marque de la vertu. Vous voyez aussi  
comme un chacun est indifferemment recueil-  
ly & fauorisé en sa Cour. Vous voyez les vns  
& les autres admis aux plus eminentes & ho-  
norables charges du Royaume. Vous voyez  
les offices de la Couronne, les gouuernemens  
des Prouinces, les Lieutenances de sa Maje-  
sté, les Ambassades, n'estre distribuées aux vns  
à l'exclusion des autres. Bref, la maison de sa  
Majesté, sa chambre, son cabinet, sa table, ses  
coffres, mesme son cœur & son front, sont ou-  
uerts à tous, & embrasse également ses serui-  
teurs, sans que la diuersité de la Religion luy  
fasse aimer cestuy-cy ou haïr cestuy-là. Non  
que ce Prince vraiment craignant Dieu, &  
non moins heritier de la pieté d'un Saint  
Louys, qu'il est legitime successeur de sa Cou-  
ronne, ne ressent en son ame vne extreme  
ioye, ou plustost un rauissement, quand quel-  
qu'un des vostres touché d'en haut renoncé à  
son erreur, & comme penitēt & conuerty s'hu-  
milie aux pieds de nos Autels.

Voilà quel est l'estat & le bon heur des



particuliers au pres de sa Maiesté, nul nes'en pouuant plaindre sans malice, & ingratitude. Et quant au general, quelle plus grande felicité scauroient receuoir les vostres selon le monde, que de jouir par toute la France de la liberte de leur conscience sous le benefice des Edicts de nos Rois, lesquels sa Maiesté vous a si gracieusement confirmez dès l'entrée de sa minorité, & mesme depuis que seant en son liect de Justice, elle le declara Maieur; Auoir en fin plusieurs places dans le Royaume particulierement affectées à la seureté de vos personnes, de vos biens & de vos fortunes, y auoir des garnisons entretenuës, auoir en vostre faueur des Cours Souueraines & Chambres mi-parties ou de l'edict, pour vous oster tout ombrage & soupçon, auoir vn fond notable du plus net & liquide des Finances de l'Estat pour l'entretienement de vos Ministres, ou pour la subuention de vos Colleges & autres choses necessaires, auoir des Deputez de vostre corps, residents d'ordinaire aupres de sa Maiesté & à ses despens, pour veiller à tout ce qui vous regarde: Ces biens faicts la, dy-ie, vous estans concedez par la bonté du Roy, pourroient-vous dire en conscience, que vous soyez moins fauorablement traitez que les autres subiects? Tout cela estât veritable, comme il est, ne sont-ce pas d'assez forts liens pour vous attacher à son seruice, pour vous faire aimer la Paix du Royaume, si vous vous aimez vous mesmes, si vos femmes & vos en-

fans vous sont chers, si le sang & la nature  
 vous attendrissent le cœur, & vous font desi-  
 rer la conseruation de ce qui vous touche de  
 si pres? Cependant (MESSIEURS) tout ainsi  
 que nous voyons l'air s'épaissir & se troubler  
 auant la tempeste, de mesme il semble qu'il y  
 ait quelques vns de vous, qui par leurs depor-  
 temens esleuent certains nuages & brouil-  
 lars, qui pourront obscurcir ce Soleil qui  
 épand ainsi ses rayons sur vous; & crains  
 qu'au lieu des bonnes graces de sa Maiesté,  
 vous n'encouriez en fin son indignation. Car  
 ie remarque que par toute la France on com-  
 mence à murmurer grandement du peu de  
 respect & d'obeïssance que vous rendez à sa  
 Maiesté, vous ayant tant de fois commandé  
 de vous separer & de rompre vostre Assem-  
 blée, sur l'assurance quelle vous donne d'a-  
 uoir puis apres esgard a vos Cahiers dont vos  
 deputez generaux ont accoustumé de pour-  
 suiure la responce. Il est aussi bien raisonna-  
 ble, que si le Roy a affaire quelque fauorable  
 traictement à ses subiects, qu'ils le recoiuent  
 de sa seule main, non pas qu'il voye à ses  
 yeux vn throne dressé qui aille contrequarant  
 son autorité. Au lieu donc d'auoir obey, &  
 de vous estre retirez doucement sans vous  
 faire harceler par toute sorte de commina-  
 tions, vous vous estes amusez à declamer cō-  
 tre les Iesuites pour premices de vos beaux  
 faicts, leur interdisant par maniere de dire, le  
 feu & l'eau, sans leur souffrir qu'ils facent au-



cune fonction Ecclesiastique dans vos places. Attentat qu'il a fallu que la Cour de Parlement ait vangé par vn Arrest solennel, qui declare perturbateurs du repos public, & criminels de leze Maïesté tous Gouverneurs, Officiers, Maires & Eschevins qui empescheront ces bons Religieux de faire toutes fonctions spirituelles dans le Villes qu'ils appellent de seureté. Enquoy vos Ministres témoignent visiblement d'auoir tres mauuaïse opinion de leur cause. Car s'ils estoient si bien fondez en la doctrine qu'ils vous preschent & qu'ils se s'entissent auoir dequoy la soustenir comme ils vous font accroire, ils ne redouteroient pas tant d'aborder ces Athletes: Mais à peine les yeux foibles peuuent soustenir les rayons du Soleil.

Il y a mesme vne autre instance touchant les affaires du Bearn dont vous pressez fort, & où vous n'avez pas plus de raison de vous à heurter qu'à tout plein de vous autres demandes. Mais afin que l'iniustice d'une telle procedure soit publiée & detestée par toute la terre, ie représenteray succinctement combien est faux le pretexte que vous empruntez, pour donner couleur aux inuentions dont vous éblouïssiez artificieusement les yeux des simples & credules, qui se laissent piper aux masques, aux apparences, & qui reputent à zele de Religion ce qu'ils voyent faire à leurs Ministres, ou à quelques autres qui sont en estime & reputation parmy vous. Le faict est donc, qu'à la naissance de l'heresie Ieanne



d'Albert Reyne de Nauarre & Princeſſe ſouueraine de Pais de Bearn, fut atteinte de la maladie du ſiecle & tomber en ceſt aueuglement, que de quitter la foy de ſes Peres pour courir apres la nouueauté; & ceſte Princeſſe ainſi ſeduite, eſtimant que c'eſtoit vne œuvre pieuſe que de ruiner tout ce qui pouuoit empêcher le progrez de ceſte nouuelle opinion, elle frappa (comme dit l'Eſcriture) le Paſteur pour diſſiper le troupeau. Son chef d'œuvre fut de deſpouiller l'Egliſe, reüniffant au domaine tout le bien temporel des Eueſques & autres Eccleſiaſtiques. Si bien que faiſant tout au contraire du peuple de Dieu, qui consacra au Temple l'or d'Egypte, elle employa ce reuenue ſacré à l'entretienement de vos Miniſtres, & aux autres choſes qui pouuoient ſeruir à l'edifice de ceſte Babel. Auioird'huy ſa Maieſté voyant que le Ciel nous auoit rauy le feu Roy d'immortelle mémoire, auant qu'il euſt rendu ce bien à l'Egliſe comme il en auoit toujours eu l'intention; & touchée d'un ſainct deſir d'accomplir les vœus d'un Prince ſi Religieux, elle a pour premices de ſa pieté donné Arreſt en ſon Conſeil, par lequel elle reſtablit pleinement les Prelats en l'ancienne jouiſſance de leur temporel. Cela donc a peu & deu faire ſa Maieſté par toute ſorte de Juſtice, le Ciel & la terre la beniffant d'une ſi celebre action. Et encores qu'elle ne fuſt obligée de donner aux voſtres nulle recompence pour remplacement de ce bien qu'ils employoient  
à diuers



à diuers vsages. Si est . ce que par excez de bonté enuers ses subjets , elle leur a accordé comme pour equiualent , autant de reuenue , sur le plus clair de son domaine , dans le mesme pays de Bearn.

Condition si juste & si raisonnable, que vos Ministres du Bailliage de Gez , & voisins de Geneue , n'ont fait difficulté d'en accepter vne semblable & de restituer le bien de l'Eglise , se contentans du fonds qu'il pleust au Roy de leur assigner pour leur entretenement.

Dequoy vous pouuez-vous donc plaindre, MESSIEURS ? Que trouuez-vous de violent & d'iniuste en cela , sinon que ce soit violence & iniustice de ne vous laisser pas faire tout ce que vous voulez ? Vous vous estiez affrian- dez depuis cinquante ans à jouyr ainsi de ce bien , & il vous fasche maintenant de le rendre à ceux sur lesquels il auoit esté vsurpé , pour ne point dire rauy. Le bon est encores, que d'un faict particulier , & qui ne regarde qu'une des moindres Prouinces du Royaume, vous en donnez l'alarme par tout , vous en faites vn cry de nation , & excitez tous les vostres à s'en ressentir , comme si c'estoit vne naureure qui vous menaçast tous du tombeau. Sur cela vous remuez toute sorte de pierres , vous deputez, vous vous tenez en corps contre l'intention du Souuerain , comme si vous estiez autant de membres détachez , & sans chef. Est-ce là MESSIEURS ) le beau fruit de vostre Euangile reformée ? Le Roy estant en terre l'image viuante

de la diuinité , est ce-là le respect & la reuerence que vous enseignez de luy porter ? Certes (M E S S I E V R S) si ceste vieille en appella à Philippe lors qu'il seroit resueillé, i'estime aussi que vous sommeillez , & ne croy pas que vous soyiez capables d'un bon conseil , que vous nourriez un peu vos yeux pour voir l'abyssme ou vous vous allez precipiter , si la clemence de sa Majesté n'a commiseration de vous. Souuenez-vous seulement qu'on ne vous en a que trop souffert par le passé, & qu'abusant de la bonté & patience du Roy , & de ses Ministres , vous ne vous pouuez excuser de n'auoir projeté dans vos assemblées tout ce qui peut menacer une Monarchie de subuersion. Ces conseils introduits dans les Prouinces , avec vos cercles qui en font la liaison , sont les premiers ingrediens de l'anarchie & estat populaire que vous meditez , à l'exemple de vos confreres & bons voisins , si on ne va genereusement au deuant de vous , ne plus ne moins qu'on se rempare quand un fleuve se desborde , l'heresie estant communement fatale à tous les Empires , ainsi que celui d'Orient nous en fait foy. Ceste autorité romnante que vos Ministres , comme autant de Salmonées vsurpent sur vous , fait assez juger de leur deuotion au bien de l'estat. Ce serment d'union qu'ils extorquent de vous , sont les bons garans de leur fidelité reformée, & ne m'estonne pas si un de vos arcs-boutans protestoit en sa belle harangue, *Qu'il suiuroit absolument tout ce qui luy seroit ordonné par Vne de*



vos assemblées ne doutant point (adioustoit-il) que le serment d'union qu'il venoit de faire & signer, n'augmente les animositez contre luy. & que partant il n'eut sujet de requerir l'assistance entiere de toutes les Eglises. Et mesmes pour bien humble recognoissance de ce que ces venerables Areopages auoient fait vn decret en sa faueur, par lequel ils luy tesmoignoient que son interest estoit cōioinct avec l'interest general de leurs Eglises, il leur iura, *Que ses biens & sa vie ne releueroient iamais que de leurs volontez.* Tel est le bon aloy de ce beau serment d'union, qui souille la couche sans macule, c'est à dire, qui adultere & partage avec autrui la foy qui doit estre reseruee entiere au seul souuerain.

En l'assemblée de Saumur.

1610.

Et si l'humeur prend quelquesfois à vos Ministres de declamer à outrance contre l'Inquisition d'Espagne, combien moins pesant estimez-vous que soit le ioug qu'ils iettent sur vos consciences, quand ils veulent que vous renonciez à vos affections particulieres pour obeir aux resolutions qui ont esté prises par leurs assemblees ou autrement tenus pour deserteurs de l'union de l'Eglise, conformément à l'acte d'un autre Consistoire, lequel entend, suiuant le decret du Synode de Priuas, *Que vous soumettiez tous vos sentimens aux deliberations des Eglises.* Et le mesme Synode exhortant vos Grands à l'union, fulmine-il pas en ces termes? *si quelqu'un se monstre irreconciliable, qu'il soit en execration iusqu'à user contre les refractaires de toutes censures, afin que nous ne soyons coupables de la froissure de l'Eglise?* O hommes disposez

Du 15.  
oct. 1612  
ou Synode de de  
Lang.

Du 17.  
oct. 1612  
à Aigue-  
mortes.

à la seruitude, disoit Tybere à ses Citoyens? Souffririez vous bien, MESSIEURS, vne si honteuse Democratie en l'estat, laquelle vous ne voudriez pas establir en vos maisons? Si vn Marcellus fut blasme d'auoir osté la teste a vne des statuës d'Auguste pour la mettre sur vn autre, quelle reproche ne meriteriez vous si vous engagiez à autrui, ce que vous ne deuez qu'à vostre Roy? A quoy tend le langage de vos Ministres, si ce n'est pour dominer imperieusement sur vous, & pour vous porter à tout ce qui leur viendra en phantasie, se constituans arbitres de la paix & de la guerre du Royaume, comme ils firent ces années passées, où ils se mirent du costé que bon leur sembla, iugeans disoient-ils qu'entre deux parties formez il leur estoit impossible & tres dangereux au point où ils estoient de subsister en neutralité par le moyen de quoy on deuient ordinairement la proye du victorieux, estans persuadez en leur conscience, que celui qu'ils embrassoient estoit le plus legitime, & le tout en consideration & sous les offres du traité fauorable que leur auoit fait représenter celui pour l'amour duquel ils faisoient ceste adion-  
 tion? Je t'ay par briefueté vne Iliade de libelles calomnieux & plains d'imposture, qu'on a veu sortir de la boutique de vos Escriuains, comme de la gueule des Enfers, tantost contre le chef de l'Eglise, comme si ce grand Pontife dispoisoit à plaisir des Sceptres & des Couronnes; tantost contre l'Eglise Romaine, comme si c'estoit ceste paillarde vestuë de scarlatte, qui enyure les Rois de sa Coupe: tan-

En la let-  
 tre escri-  
 te au  
 Prouin-  
 ces par  
 l'assem-  
 blee de  
 Nismes.  
 1615.



toft contre vne pauvre & innocente Societé  
de Religieux, cōme s'ils estoient autant d'af-  
fains : tantost contre la forme du gouerne-  
ment, comme s'il n'y auoit rien de bien regy  
que ce que vous conduisez. Il me faudroit aussi  
vne rame de papier si i'auois à descrire tous  
les tumultes & vacarmes que vous auez faits  
dans les villes où vous estes les plus forts, com-  
me à Montpellier, à Nîmes, à la Rochelle, &  
ailleurs, voire iusqu'à nous auoir fait voir ceste  
execrable impieté, que quelques vns des vostres  
ayent foulé au pieds la sacro sainte Eucharistie, *A Mi-  
l'aux en*  
ainsi que nos Prelats s'en plainquirent à la face des *Rou-  
Estats generaux.* *gue*

Tout cela (MESSIEURS) s'est fait par le passé, *614°*  
on la veu, on la senty, on en a fremy, & le  
Ciel & la terre en ont eu horreur. Vn Cheua-  
lier Romain disoit qu'on auoit repris ses paro-  
les, parce qu'on n'auoit rien trouué à redire à  
ses actions; Mais à ce compte vous estes blas-  
mables en l'un & en l'autre, au dire & au fai-  
re. Neantmoins la clemence du Roy a couuert  
ce tombereau d'ordures, ne plus ne moins que  
la misericorde de Dieu couure l'iniquité du  
pecheur. Considérez (MESSIEURS) considérez  
combien iuste & plausible seroit le pretexte  
que sa Maiesté auroit de vous chassier les ar-  
mes à la main, si par vostre rebellion elle  
estoit contrainte de venir à ceste extremité,  
laquelle ie ne doute pas qu'elle n'euite le plus  
qu'il luy sera possible, n'y ayant sorte de voye  
douce qu'elle ne tienne auant que d'apporter

le cautere à ceste playe, sa Majesté ne ressemb-  
 blant pas à vn mauvais Prince, qui disoit que  
 le corps d'un ennemy tué sentoît bon, mais  
 que celui d'un Citoyen mort sentoît encores  
 meilleur. Elle n'ignore non plus que la victoi-  
 re és guerres civiles est mesme dommageable  
 au vainqueur. De voir aussi ses commande-  
 mens mesprizez par ses propres subjets, c'est  
 chose qu'elle ne souffrira jamais, & m'assure  
 que les plus modestes d'entre vous blasme-  
 roient toujours ceux qui par leur felonnie au-  
 roient ainsi attiré son courroux sur vos testes.  
 C'est pourquoy s'il y a des esprits turbulens &  
 factieux parmy vous, représentez-leur quel se-  
 roit le detrimement qu'ils apporteroient à vostre  
 Religion, si sa Majesté reuoquant ses Edicts,  
 il falloit que tout plein de vos Eglises espar-  
 ces çà & là, eussent à abandonner le pays, com-  
 me elles ont faict autresfois, errantes par les na-  
 tions estrangeres, & priuées du gracieux séjour  
 de la patrie. Car pour trois ou quatre Prouin-  
 ces qu'il y a dans le Royaume, où il semble  
 que vous ayez quelque establissement pour les  
 places de seurété que vous y tenez: Si est-ce  
 qu'en tout le reste de la France, il n'y a que la  
 seule authorité du Magistrat qui vous y main-  
 tienne, & garantisse de toute violence & op-  
 pression. De vous glorifier ny de vous vanter  
 non plus de ce que vous pouuez, nous n'igno-  
 rons pas l'estat de vos affaires. Ne vous laissez  
 pas beffer à la rodemontade de celui qui vous  
 disoit à Saumur, *qu'il vous fera voir quand il vous*



plaira, que vous pouvez plus quand vous voudrez vous résoudre à l'offensive, que tous ceux qui vous menacent & qui font mine de vous vouloir faire la guerre. Nous sçauons qu'il n'y a part du Royaume, où vous ayez des villes, que les Catholiques n'y en aient aussi, qui sont voisines des vostres, leur auantage par dessus vous estant encore tel, graces à Dieu, que pour dix hommes que vous soyez, il y en a cent des leurs. Dauantage qui peut mettre & entretenir des armées sus pied qu'un puissant Roy qui abonde en finances, en canons, en poudres, & autres munitions nécessaires pour les grandes expéditions? Qui doute que si vous n'avez pour retraite que vos places, qu'en fin le fort n'emporte le foible? Pour secours estranger de qui le pourriez-vous attendre? L'Allemagne en sa reuolte a assez d'affaire chez soy. Les pays bas ont besoin de la France, & pour l'Angleterre elle est regie par un si sage Monarque, qu'il ne fortifiera jamais d'armes ny de conseil des subiects contre leur Prince, tant il y a d'intérêt luy-mesme à la conservation de la Royauté. Et si entre nos Catholiques il y auoit quelque membre pourry qui vous adherast, la malediction dont l'ire du Ciel l'iroit poursuuant, nous vengeroit assez de sa perfidie. D'ailleurs representez-vous (MESSIEURS) les horreurs que la guerre comme vne furie infernale, traine apres soy. Representez-vous les carnages des batailles, les saccagemens des villes, les violemens, les voleries, & rançonnemens de la campagne, les cris, les

hurlemens des veſues & des orphelins. Représentez - vous en fin les imprecations du marchand & du Bourgeois, lesquels nourris en repos dans la paix, changeront tout le train de leur vie en trouble & en agitation. Car outre la perte d'un gain ordinaire, ils ſe verront tous les jours aſſeruis à la garde d'une porte de ville, & n'auront la nuit pour cheuet que le creneau d'une muraille, n'y ayant forte de brauade & de mauuais traitement qu'ils ne ſouffrent d'un ſoldat insolent, logé en garnison dans vos maiſons,

Voila (M E S S I E V R S) qu'elle eſt l'image hideuſe de la guerre. Image certes bien différente de celle de la paix, laquelle comble de route felicité. Si ceux de la ville de Tyr, au mal-heur qui les menaçoit, attacherent leur Dieu tutelair avec une chaine d'or, que ne deuez - vous faire pour ne laiſſer eſchapper une ſi heureuſe paix qui eſt comme voſtre Palladium ? Dieu vous inspire donc tous, & deſtourne les verges qui vous ſont appreſtées, ſi vous continuez en voſtre deſobeyſſance. Car ſa Majeſté n'a pas ſujet de dire aujourd'huy comme cet Ancien, qui ſe plaignoit qu'il ne gouvernoit plus que les Reliques de ſa Republique, ains la France, en l'aſſiette qu'elle eſt maintenant nous la pouuons dire eſtre auſſi florissante qu'elle ayt jamais eſté ſoubs l'empire d'aucun de nos Rois. Si bien que la force de l'Eſtat, & la grande eſperance de la valeur du Prince, me fera luy attribuer pour bon augure, ce que le docte



docte Rôfard disoit d'un de ses predeceffeurs.

*Au fier maintien, au superbe courage,  
 Qui rien que Mars ne monstre en son visage,  
 Sera L O V I S Gouverneur des François  
 Non Roy de nom, mais le maistre des Rois,  
 Jusques au Ciel fera monter l'Empire  
 Du nom G A V L O I S, & nul devant son ire  
 N'opposera ny lance, ny escu,  
 Qu'il ne soit pris fuitif, ou vaincu.*

Mais parce que les Monarchies ne sont pas seulement puissantes & redoutables par les armes, nous voyons encore sa Maïesté couronnée des autres vertus, qui rendent un grand Roy toujours plus auguste. Car pour la Pieté, nous luy voyons embrasser avec zele la Religion de ses Peres; & fauoriser l'Eglise de tout son pouuoir; Nous luy voyons reuerer la Iustice le Temple de laquelle il fait soutenir par de si fortes colonnes, qu'il sera l'eternel Asile des bons contre l'oppression des meschans. Tout en fin ne respire que force, & que grandeur en l'estat, tant en la sacrée personne du Prince, qu'en la fidelité des dignes personages qui l'assistent, puisque Iupiter mesme ne lançoit ses foudres sans conseil. Or tout ainsi que ce Sage Romain devenu aueugle, disoit qu'il auoit eu regret auparavant de n'auoir point d'yeux; Mais que voyant la nouuelle infortune de sa Republique, il voudroit n'auoir point d'oreilles pour l'entendre; De mesme i'estime que la fleur & essite des ames magnanimes & genereuses,

qui approchent sa Maieſté, & en qui elle prend creance: aimeroient mieux n'auoir iamais eſté nées au monde, ſi elles ne voyoient eſtoufer en leurs iours les maudites ſemences de l'eſtat populaire, que vos Miniſtres proiettent dans leurs Conuenticules, ſuiuant le bon precepte que leur en donne Caluin en ſon Inſtitution, où diſcourant des trois formes de gouuernemēt, il prefere la Democratie à la royauté, *Vray eſt, dit-il, que ſi on faiēt cōparaiſon des trois eſpeces de gouuernement que j'ay recitées, la préeminence de ceux qui gouuernent tenant le peuple en liberté, ſera plus à priſer, non point de ſoy, mais parce qu'il n'aduient pas ſouuent, & eſt quaſi miracle, que les Rois ſe moderent ſi bien, que leur volonté ne foruoye d'equité & droicteure.*

N'eſtimez pas pourtant, MESSIEURS, que je corne la guerre, ny que mes paroles ſoient autant de flambeaux qui aillent allumer le feu par toute la France: Mais bien ne vous puis je celer, que comme Catholique & vray François, je m'eſiouyray touſiours de voir mon Roy puiſſammēt, fortifié & aſſiſté, non ſeulement de perſonnes eminentes en conſeil, mais d'autres auſſi qui le ſont en valeur, en execution, & ſans leſquels il n'y auroit que foibleſſe en l'Eſtat, les Atheniens nous en ayant laiſſé vn ſymbole notable en la couſtume qu'ils auoient de repreſenter leurs Dieux armez, voire meſme Pallas & Venus: comme auſſi les anciens Allemans, (remarque Tacite) ne deliberoient jamais d'affaires ſerieuſes & importantes au public, qu'ils



n'eussent les armes sur le dos, pour monstrier qu'ils scauoient executer leurs resolutions.

Si toutes choses sont si bien establies au dedans du royaume, elles ne le sont pas moins fauorablement au dehors, le Roy & par ses nouvelles alliances, & par ses anciennes confederations viuant en tres-bonne vnion & intelligence avec tous les Princes ses voisins.

Pourtant, MESSIEURS, ayans vn Roy si aimable pour sa bonté, si redoutable pour sa puissance, & le voyans aujourdhuy d'aage de monter à cheual, & de commander ses armées, qui seroit si temeraire, si audacieux que d'oser luy desobeyr? Croyez, MESSIEURS, que ce n'est pas sagesse au seruiteur de se vouloir faire craindre à son maistre, & d'arracher quelque chose de ses mains par capitulation. Toutes demandes excessiues qu'on obtient par ceste voye, sont volontiers ruyneuses, & ressemblent à ces statuës disproportionnées, qui tombēt d'elles mesmes à terre. Vous ferez donc, s'il vous plaist, vostre profit de ceste salutaire Remonstrance, sans la reietter par passion, semblables aux fieux qui trouuent le vin de mauuais goust, pour bon qu'il soit. Souuenez-vous MESSIEURS, souuenez vous, que l'Histoire Grecque louē la ville de Corinthe, de ce qu'en ces Temples on n'y voyoit pour ornement nulles despoüilles gaignées sur ceux de sa nation, ains on n'y appendoit que les trophées conquis sur les Barbares & estrangers. Quel blasme au cōtraire fera ce à ceux qui feront cause que la Fran-

ce tourne contré vous les armes qui ne de-  
 uroient estre employées que contre les Infide-  
 les, & que nos Temples & nos Eglises ne soient  
 tapisées que des despoüilles gagnées sur nos  
 Compatriotes?

Vous n'ignorez pas qu'il y a de vos Confre-  
 res, & des plus qualifiez, qui voyans qu'en ce-  
 ste occasion il n'y va point de la liberté de vo-  
 stre conscience, ny de la leur, ains de la seule  
 conseruation de l'autorité Royale, & de  
 l'honneur de la Monarchie, protestent à sa  
 Majesté d'estre autant d'instrumens de vostre  
 ruyne, si vous ne ployez à ses commande-  
 mens. Ce sont ceux-cy qui se sont tousiours  
 tenus attachez au seruice du Roy, quelques  
 mouuements qu'on ait faits au contraire. Ce  
 sont ceux cy qui ont blasmé ceste procedure  
 de quitter l'Assemblée legitime d'une ville,  
 pour s'aller percher en vn autre, contre la vo-  
 lonté du Roy. Ce sont ceux-cy qui ont defa-  
 uoüé, les Conuenticules du Bearn. Ce sont  
 ceux-cy qui detesterét dernieremét l'effronte-  
 rie de ce Ministre, qui eust l'audace de dire au  
 Roy, que vous auiez resolu de ne vous separer  
 point qu'on n'eust respondu vos cahiers. Bref,  
 ce sont ceux-cy qui ne trempent nullement à  
 toutes vos remises où longueurs pour donner  
 satisfaction à sa Majesté. Aussi mon intention  
 n'est pas en blasmant les esprits violents &  
 factieux qui sont parmy vous, d'offenser ny de  
 comprendre en leur nombre les ames debon-  
 naires. Car ie sçay que de tout temps il y en a



en entre vous d'vns & d'autres. Il y a mesme *Carpen-*  
 plus de 40. ans qu'un sçauant Iurifconsulte des *tarius*  
 vostres nous dépeignit leurs humeurs. Les no- *ad*  
 stres, disoit-ils, estoient doux & pacifiques, *Franc.*  
 contents de leur presente fortune, & de la Cle- *Port.*  
 mence de leur Prince. Eux au contraire fort *anno.*  
 turbulens, audacieux, & non contents de la li- *1572.*  
 berté de conscience & exercice de la Religion  
 qui leur est octroyée, ils vouloient tout ren-  
 uerser, se nourrissoient de seditiō, & prenoient  
 l'incertain pour le certain. Bref, toutes les mar-  
 ques par lesquelles en l'Escripture saincte on  
 peut discerner les bons d'avec les mauuais,  
 nous separoient d'eux. Ils faisoient assiduele-  
 ment conuenticules & assemblées. Là ne se  
 parloit ny de Dieu, ny de paix, ny de tranquil-  
 lité. Les propos qui s'y tenoient n'estoient que  
 de guerres & dissensions. En public ils met-  
 toient en auant le pretexte de la Religion, en  
 secret ils ne bastissoient que guerres & dissen-  
 sions. Et comme Minos & Licurgue, ils fon-  
 doient le principal appuy de leur republique  
 sur les armes. Aussi toute l'esperance de leur  
 cause reposoit du tout sur la force. Et nō com-  
 me des calamitez des guerres passées, dont on  
 void encore toute la France ruinee, ils vou-  
 loient, afin que i'vse du mot de Samuel, deuor-  
 rer perpetuellement la France de leur glaive.  
 Nous au contraire, à l'exemple des Lacedemo-  
 niens, estimions qu'il falloit sacrifier aux Mu-  
 ses & non à Mars, c'est à dire, qu'il falloit cer-  
 cher tous moyens hōnestes de reconcilier nos

aduerfaires par tous bons offices, fans les prouoquer dauantage par iniures, ny par armes à l'encontre de nous.

Ce bon personnage parlant ainfi de son temps, i'estime, MESSIEURS, que vous n'auuez pas moins de fuiet de tenir à present le mefme langage, en deteftant l'humeur de vos esprits boüillans, que ie pourrois encores comparer à ceux dont le Sereniffime Roy de la grande Bretagne fe plaignoit autresfois à son Fils, comme de gens, qui parmy les defordres empieterent tellement l'autorité fur le peuple, qu'ayans apres goufté la douceur du commandement, ils commencerent à fe figurer entr'eux vne forme de gouuernement populaire, &c. Et par la licence du long temps de ma minorité, auancèrent tellement l'œuvre de leur Democratie imaginaire, qu'ils ne fe nourriffoient plus de là en auant que de l'efperance de ce faire Tribuns du peuple. De sorte qu'en leurs sermons populaires, j'estois fouuent calomnié, non pour mal qu'ils trouuaffēt en moy, mais feulement parce que j'estois Roy, ce qu'ils m'imputoient à grand crime, &c. Gardez vous donc, mon Fils, de ceste sorte de Puritains, vrayes pestes en l'Eglise & en l'Eftat, gens que nul bien-faiēt ne peut obliger, nul ferment ne peut lier, ne respirans rien que calomnies, que sedition, aspirās fans mefure, & plus haut qu'ils ne doiuent, crians & clabaudans fans raifon, & authorifans fans caution de la Parole de Dieu, leurs imaginations propres, pour en faire là



regle de la concupiscence. Je proteste deuant Dieu, & comme si je faisois mon Testament, auquel il n'y a lieu de mentir, que vous ne trouuerez point parmy les voleurs des montagnes, ou de la frontiere, de plus signalées insolences, & de desfreiglemens, & d'auantage de perfidies, que parmy ces esprits ambitieux & fanatiques.

Si tous les Ministres, tant d'Ecosse, d'Allemagne que de la France, pechent donc grandement és choses de l'Estat, penseriez-vous que leur cause fust plus juste, plus fauorable en ce qui regarde l'instruction de vostre salut? Non certes, MESSIEURS, car vous estes trompez en l'un & en l'autre, en l'ame & au corps. Qu'ainsi ne soit, nous voyons tous les jours nos Docteurs faire tomber les armes des mains de vos Ministres, & les rendre muets comme des poissons, en opposant l'antiquité de nostre Religion à la nouveauté de la leur, nostre vnité à leur diuision, nostre vniuersalité à leur particularité, nostre multitude à leur petit troupeau la legitime succession de nos Pasteurs à l'intrusion des vostres, & finalement en opposant l'eminent sçauoir & la profonde doctrine de toutes nos lumieres à l'ignorance de vos mesmes Ministres. Aussi suiuant l'oracle de nostre Poëtes.

*Il ne faut pas beaucoup auoir d'experience  
Pour estre exactement docte en vostre science,  
Les Barbiers, les Massons en un iour, y sont Cleres,  
Tant vos mysteres sont & cachez & couuerts.*

Il faut tant seulement avecques hardiesse  
 Detester le Papat, parler contre la Messe.  
 Il faut pour rendre aussi les peuples estonnez,  
 Discourir de Iacob, & des predestinez,  
 Avoir S. Paul en bouche, & le prendre à la lettre,  
 Aux femmes, aux enfans, l'Euangile permettre,  
 Les œuvres mespriser, & haut loüer la Foy,  
 Voila tout le sçavoir de vostre belle Loy.

J'espere neantmoins que Dieu vous fera à tous  
 la grace d'estre vn iour esclairez dans ces te-  
 nebres, & que quittant vne si mauuaise Esco-  
 le, vous entrerez dans nostre Eglise, où avec la  
 bonne instruction que vous y receurez de vo-  
 stre salut, vous y apprendrez encores à bien &  
 fidelement seruir le Roy.

*Vt imperium euertant, libertatem præferunt ; si euer-  
 terint, ipsam aggredientur.*

FIN.





